

咨誰使賫去通事曰大人受來何數此言唐官曰大國送咨本國何以令我賫去云臣令通事言于唐官曰本國各別差人則回咨當改書矣大人之行甚速而回咨則非一日所書唐官仰天良久曰然則塗擦文字可也荅曰本國於大國回咨雖一字錯書不能塗擦況全改乎請更思量唐官又良久曰然則我當持歸伊而慰接官退到以此意言之傳曰今觀啓意唐官欲諱到王京之意也○傳曰今聞唐官之言回咨差人送之云則唐官處無奈可諭乎千秋使發程在十三日賫送此行何妨此意議于承文院及禮曹禮曹回啓曰當初唐官不當到王京而只以取回咨執言而來也今雖曰差人送之不可從其言也元混令通事開諭既已賫去則不須改也承文院都提調尹殷輔等啓曰唐官咨文不欲賫去則於千秋使入送事上教允當傳曰唐官若於義州使之差人以送而不持去則其時當可更議姑置之○太白晝見○夜有氣如火○全羅道長水縣地震○壬子以柳仁淑為吏曹判書鄭順朋為戶曹判書史臣曰仁淑自